



QUÆSTIO MEDICA,

*Cardinalitiis disputationibus manè discutienda in Scholis
Medicorum, die Jovis 27. Martii 1721.*

M. JACOBO FOURNEAU,
Doctore Medico, Præside.



An perturbationes motum cordis sanguinisque angeant, minuant?

I.

HOMO nec anima sola, nec solum corpus, sed utrumque simul: existit ex communione animum inter corpusque intimâ, quæ in mutuâ cogitationum ac motuum *reciprocatione* continetur: hinc alterum alteri, & cogitatio motui, & motus cogitationi, vicissim prævium; alioqui aut machina totus homo mera, aut machina in homine nulla. Inde prout motus in corpore, subiti vel præcepti, validi vel languidi, diuturni vel interrupti, ita cogitationes; prout cogitationes; ita motus: unde & prævius cogitationem motus excitat, & subsequens motum fovet augetque porro cogitatio; vicissim, & prævia motum cogitatio procreat, & subsequens cogitationem fovet stimulatque motus. At quo pacto? Totum corpus, quia machina *ὁργανικὴ*, vasculosum: vasa sanguifera aut desinunt in cor, aut à corde incipiunt, amplâ eâ extremitate; inde divisa in ramos, rami in ramulos, ramuli in ramusculos, ramusculi in capillamenta: quorum ex ultimis in cranio & spinâ dorsali finibus existit medulla tum cinerea tum alba; hæc in longas è piâ durâque menynge constantes vaginas producta constituit nervos, quoquoqueversum diffusos, tensos, vibratiles; imò, quandiu machina sana consistat, & vasa sanguifera nunquam à perpetuâ vibratione cessant, quia indesinenter dilatantur affluente sanguine, atque effluente contrahuntur; & nervi perpetuas obeunt vibrationes, quia æmulari coguntur alternas pulsationes contractionesque cerebri, medullæ spinalis; menyngeum, quorum sunt propagines; denique nulla in corpore fibra, ne cartilaginea quidem, ne ossa quidem, vibrationum experts, quia nulla liquore

A

affluente non dilatatur, nulla effluente non contrahitur: unde & perpetua ubique alternatio, & vivax ubique elaterium. Vibratio autem fibrarum duplex, altera nativa, adventitia altera: Nativam dicimus eam, quam natura ipsa instituit ad perfectam machinæ integritatem & sanitatem, qualis in homine tranquillo & sano arteriarum pulsatio: vibratio ea in certo quodam & magnitudinis & celeritatis gradu consistit, ultra & citra quem jam à seipsâ degener, adventitia dici debet; itaque hoc nomine censeatur vibratio quævis à gradu naturali desciscens aut per excessum aut per defectum: gradum vibrationi nativæ proprium, nec eundem pro singulis hominibus, nec eundem pro eodem in variâ ætate statuimus. Nativus in corpore motus nullam sui conscientiam per se iple excitat, nullam cogitationem sibi adjunctam habet nisi forsitan innatam: v. g. naturalis oscillatio fibrarum, fluxus sanguinis cognatus, intestinus liquori congenitus motus, vibratio nervorum vasorumque nativa, pulsatio cordi, arteriis, menyngibus insita, nullam per se sensationem, nullam imaginem, notionem nullam, aliamve peculiarem cogitationem, teste experientiâ, pariunt; alioqui ea cogitatio nunquam non animo obversaretur, quamdiu machina sana staret. Ergo cogitationes in nobis singulæ adjunctas sibi habent vibrationes adventitias; v. g. nativa nervorum opticorum vibratio visionem non excitat; quia nunquam à videndo cessaremus; at, si luminosus radius oculum feriat, atque vibrationem nativam excessu defectuve mutet, adeoque adventitiam faciat, statim pariet quoque visionem sibi congruam. Hinc vocabula, quæ non animi, non corporis, sed hominis ex animo & corpore conflati affectum sonant, ea rem significant singula unam non simplicem sed ex motu corporeo & incorporeâ cogitatione compositam. Scilicet sensatio constat ex nato externè nervi sensorii motu qui totâ longitudine introrsum ad cerebrum usque propagetur & ex cogitatione motum eundem naturaliter consequente. Pariter imago ex motu intra cerebrum & nato & coercito atque ex cogitatione eidem motui congruento constat. In nervis autem multum interest unde oriatur & quò propagetur motus: Namque extra cerebrum natus nec ad cerebrum usque perductus nullam sensationem excitat, ut in paralyti liquet: Extra cranium natus sed ad cerebrum usque diffusus creat sensationem: In cranio natus & coercitus parit imaginem: In cranio natus sed ad superficiem usque corporis delatus efficit sensationes deliras: hinc explicata quo pacto imago possit in sensationem degenerare; quo nempe pacto possit quis viros audire tragædos in vacuo lætus sessor plausorque theatro, possit in loco prorsus arido videri sibi immerfus in aquam mento tenus, possit nullo diffuso odore meras olfacere suavitates, possit qui nihil edat viros gustare sapes, denique possit qui nihil tangat delicias tractare meras: ista ludibria efficit motus à cerebro propagatus ad papillas nervorum extimas, & ab hisce ad cerebrum usque repercussus.

PERTURBATIONI prævia multa, sine quibus ea oriri nequeat : 1°. Rei perturbationem excitantis notio orta, vel ex sensu, vel ex imaginatione, vel ex intellectu; nihil enim aut amare aut odisse possumus, nisi quâdam jam notitiâ præceptum : 2°. Judicium, quæ rem judicemus vel appetendam vel refugiendam : 3°. Vel delectatio pelliciens ad rem quatenus bonam, vel fastidium avocans à re quatenus malâ; & illa quidem suis singula conjuncta motibus: deinde sequitur perturbatio ipsa ex motu corporeo & incorporeâ cogitatione constans. Sed qualis illa cogitatio? qualis ille motus? scilicet non quævis cogitatio perturbationem efficit; cognitio præit quidem, sed non consiliatur; ergo ad voluntarem attinet; &, quoniam indifferentia nullam creat animi commotionem, cogitatio idonea aut amor est quidam aut quoddam odium, quæ varios induunt vultus prout amoris odiove luperveniunt alii affectus, sensationes, imagines, notiones, judicia, attentiones, delectationes, fastidia, mentis evagationes; unde perturbationes ab invicem discriminantur, & singulæ sint dicanturque spes vel desperatio, gaudium vel tristitia, audacia vel timor, anxietas, admiratio, ira, &c. Attamen nec amor quivis, nec quodvis odium aut esse aut dici perturbatio potest; alioqui, quoniam & perpetuo amore felicitatem, & miseriam odio perpetuo prosequimur, perpetuâ etiam perturbatione jactaremur: sint itaque & amor & odium cum certo conjuncta motu, cujus gradum omnem pedetentim æmulentur. Rursùm nec motus omnis, amoris odiove congruus, efficit perturbationem; alioqui omnis volendi nolendive affectus esset perturbatio, ac perpetuâ perturbatione quateremur: Is se motus in omni perturbatione prodit aut variâ agitatione corporis, aut jactatione membrorum, aut coloris mutatione, aut corporis stupore, aut mentis anxietate, aut capitis dolore, aut alio denique argumento, qualia in perturbatis deprehendere solemus. Proinde vibratio nativa; quamvis amoris odiove sociata statuatur, perturbationem efficere non idonea; sed requiritur adventitia, à nativâ degener vel excedendo vel deficiendo: Nec tamen omnis vibratio adventitia, licet amoris odiove conjuncta, perturbatio; alioqui omnis amor, omne odium, rei cujuslibet peculiaris, esset perturbatio; sed requiritur vibratio à nativâ ita degener, ut illa degeneratio à cerebro & corde ad alias corporis partes propagetur; inde enim oriuntur omnia perturbationum eventa & effecta, quæ non in corde, non in cerebro stant, sed ad corpus universum derivantur: quæ degeneratio quò major, eò majorem perturbationem patiet; eò minorem, quò minor; si insensibilis, insensibilem. In investigandâ autem perturbationum sede naturam sequamur ducem: sicut eâ duce, non ex arbitrio, non ex præjudicio, non ex errore, officia ad organa, visum ad

oculos, auditum ad aures, olfactum ad nares, gustum ad linguam, tactum ad superficiem corporis, imagines, ideas, judicia, ratiocinia, memoriam, cognitionem quamvis ad cerebrum omnes homines referimus; ita naturâ auspice, non ex lubricitate, sed ex instinctu ineluctabili ac naturali, adjudicamus velut organo cordi amorem atque odium; Cor itaque amoris odii organum, ergo in eodem mechanica perturbationum origo & sedes: Atqui amor noster pondus nostrum, illo movemur quocumque movemur: Proinde cor mechanica princeps causa motrix corporis, eademque causa effectrix perturbationum vera & immediata: Denique & cerebrum & meninges à corde quasi à origine mutantur motum, quo eidem ad motus suos exerendos & perpetuandos opitulantur. An igitur cerebrum ab omni perturbationum efficiendarum officio removebitur? Non ita sanè: prævias enim ac necessario præmittendas perturbationi occasiones sufficit, nempe notiones, sensationes, imagines, judicia, delectationes, fastidia, ratiocinia, memoriam, attentionem: quæ omnia suis sunt conjuncta vibrationibus adventitiis vel tardioribus vel celerioribus, majoribus vel minoribus; quoniam cogitatio nulla peculiaris, sine suo motu, & quidem non illo nativo, sed adventitio.

III.

JAM ad motum muscularem nervi maximè conferunt: quæ vis & facillimè & simplicissimè explicari potest, quamvis nullum spiritum animale, nullum succum nerveum, nullum denique liquorem peculiarem devehere supponantur: Nimirum in quovis musculo genera fibrarum duo distinguuntur; quarum aliæ carnosæ, rubræ, sanguine turgidæ, invicem appositæ, crassæ, ductu productæ suo; aliæ nerveæ, carneis transversæ, invicem parallelæ, tenuiores, colore tendineo seu nerveo: hæ carnosas decussando, easque ex intervallis stringendo, efficiunt illas in fibrillis carneis vesiculas, quas quidam falsò statuerant esse Rhomboidæas, at cum oculus microscopio adjutus, tum ratio evidens evincit esse ex arcubus æqualibus circularum invicem æqualium undique confectas; sed ita stringunt hæ tamen illas ut supersit semper è vicinâ in vicinam vesiculam communicatio modò angustior modò patentior, nisi in violentissimâ constrictione. Motus cum musculi habeant duos, nativum unum, alterum adventitium; utrique eâ ratione manifestissimè possunt nervi sufficere. Etenim cerebrum, medulla spinalis, & utrobique meninges pulsant, ut docet autopsia: nec pulsare possunt, quin nervos ex sese oriundos, quique nihil aliud sunt quam substantia medullosa vestita meningibus atque velut in funiculos extensa, convellant, similesque ad pulsationes provocent; unde vibrationes alternæ nervorum: Quoniam autem nervi sunt tensi, flexiles, vibratiles; motus in unâ extremitate natus facillimè ac citissimè ad alteram usque propagatur: ergo vibratio in cranio impressa nervo producet totâ longi-

5

todine ad musciculum usque in quem nervus inseritur. Si vibratio adeo tantum nativa, nervi per fibras suas transversas aut laxatas aut contractas, ita aut laxabunt aut stringent alternis fibras carneas, ut in musculo oriatur vibratio tantum nativa; si nervo inest vibratio adventitia, jam nervus per suas fibras transversas & contractas & laxatas ita stringet laxabitque alternis fibras carneas; ut hæc minus magisve contractæ sanguini affluenti præbeant angustiotem ampliotemve transitum, isque minus magisve effluens, cum semper affluat, fibras carneas contractas magis minusve impleat, inflet, breviet, unde contractio musculi adventitia; ut eadem, fibrillis postea nerveis relaxatis, laxatæ liberum sanguini pendant canalem, depleantur, detumescant, elongentur, unde adventitia relaxatio musculi. Hinc per alternas nervorum tensorum laxiorumve vibrationes oriuntur, alterna in arteriis venisque contractio ac dilatatio, alternum in fibris æquilibre elaterium. Aliunde cor jugi motu per omnia vasa sanguifera sanguinem aut admittit aut emittit alternis; ergo passim vasa sanguifera, in ipsis quoque nervis, alternas à sanguine affluente dilataciones, alternas eodem effluente contractiones patiuntur; easdem quoque subeunt liquorum quorumcumque alvei; altera proinde vibrationum in nervis ac fibris omnibus causa. Ita autem invicem implicantur cerebri cordisque officia, ut sicut cor indiget auxilio nervorum ad vibrationes suas peragendas, ita cerebrum ac dura meninx non nisi impulso per cor sanguine vibrationes obeant suas; alterum proinde alterius pulsationem, subsidentiam, tempora, vim, intervalla, modos, variationes æmulabitur: prout itaque alterum vibrationes exercebit, lentiores vel celeriores, validiores vel debiliores; ita alterum: unde, sicut ambo ad excitandam contulere perturbationem, ita ambo fovant natam, ita ambo efficiunt ut ægerimè sedetur; ea enim compesci nequit, nisi motus, qui eam efficit & perennat, ope primatur: hinc intellige summam imbibitæ penitus consuetudinis cuiusque tenacitatem.

IV.

PERTURBATIO res est multò minus simplex, quàm opinari vulgò placet: Namque motus ab unâ cerebri parte ad aliam propagatus novas excitat cogitationes, à cerebro & corde ad vicinas translatus rursùm novas, denique novas ad corpus univertsum serpens: quot ergo & quàm varix cogitationes, notiones, imagines, sensationes, judicia, amotes, odia perturbationi æstuant insunt, quam celeriter nascuntur? hinc eloquentia maximè pendet: iterum quot in corpore motus, quàm varii, quàm incompociti, quàm oppositi, quàm rapidi? hinc tanta in actione Oratoris, in voce, in gestu, in motu corporis significante animi motum, vis ad persuadendos animos & commovendos. Qui motus sicut à cerebro ad cor, sicut ab his organis duobus ad univertsum corpus propagari possunt: ita à corde ad cerebrum, ab uni-

verso corpore ad illa potissima organa duo retorqueri; atque per multas vicissim repercussiones totâ nervorum partiumque connexarum longitudine pervagari & possunt & debent & solent: Ea tamen communicatio motuum inter aliqua organa major, celerior, manifestior, ob multiplicem connexionem, mobilitatem faciliorem, ardiorem secum colligationem, situm propinquiorem, ampliorem commodioremve liquoris derivationem. Proinde in toto passim corpore eveniet, ut nervi, dum fibras carneas aut stringunt, aut laxant alternis viamque sanguini aut claudunt aut aperiunt, varias in omni parte efficiant vibrationes, jactationes, intumescencias, coloris mutationes, stupores, tremores, motus convulsivos, vertigines, tinnitus, balbutionem, titubationem, secretionem spumæ agitissimæ quæ saliva est, concussionem viscerum, anhelationem, palpitationem: Unde liquores, qui motum æmulantur partium solidarum, varias etiam subibunt mutationes in motu cum intestino tum progressivo, proinde diversos tritus, aliam tenuitatem aut crassitudinem; denique variabuntur omnia corporis officia, eaque omnia eventa eò copiosiora incident, quò perturbatio major, quò ex pluribus quasi perturbationibus una composita; rarò enim simplex, vulgò multiplex, aut amicæ & simul vegetæ, aut oppositæ & successivæ, sed brevissimo intervallo, ita ut nec successio notetur & una repugnantibus affectibus conflata videatur. Porro vibratio adventitia à nativa degenerat vel per excessum, vel per defectum: itaque perturbatio adjunctam sibi habere potest vibrationem nativâ, aut validiorem aut debiliorem, aut celerior, aut tardior, aut majorem, aut minorem: sicut constat sensationem caloris excitari motu majori quàm qui corpori insit, frigoris verò minori; sicut liquet sensationem humiditatis nasci ab auctâ corporis nostri humiditate, siccitatis ab imminutâ; denique in aliis aliquando perturbationibus videmus corpora torpidiora languere, in aliis agitatione jactari, quam fert nativa corporis tranquillitas. Quanam verò arte distingues inter perturbationem à vibratione auctâ, an ab imminutâ natam? Dijudicatio ut necessaria, ita facilis. In omni perturbatione caput aut amor, aut odium: 1°. Si animus judicat, vel bonum, quod amat, parabile, vel malum, quod odit, vitabile esse; consensum illius assecutionem, depulsionem hujus, ineluctabili felicitatis amore & odio miseræ insuperabili raptus, molitur, eoque acrius, quò amor, odium, persuasio majora; si contra, omnem remittit industriam, nec se irritis conatibus fatigat: 2°. Si bonum quod amat, malum quod odit, præsentia spectat; ruit animus ad fruendum illo, in fruendo quiescit; ruit ad deviationem hujus; vano conatu, languet; prospero, exultat: 3°. Si animus, bonum quod amat, malum quod odit, præterita spectat; quasi futura spectaret, idem erit ipsius habitus: 4°. Boni malique cogitatio, si animum subeat simpliciter sine ullâ comparatione, excitabit imperus animi multos ad illius consecutionem, ad hujus deviationem. Atqui corpus in suis vibrationibus, quantum quidem machi-

na ferre potest, æmulatur animi impetus, languores, habiturque omnem. Ergo ubicumque animus seipso acrior in aliquâ perturbatione erit, aderunt auctæ in corpore vibrationes; ubicumque seipso languidior animus, imminutæ.

V.

ADSIT itaque perturbatio, constans ex amore boni quod parabile videatur, ex amore viarum omnium quibus parabile censetur, ex notione felicitatis alicujus in eo sitæ, ex judicio quo judicamus nos ad illius assecutionem pervenire posse, & reverâ perventuros esse; quæ perturbatio propriè spes dicitur. Quot cogitationes, tot motus; & quia amor actualis non iners, proinde vibrationes auctæ in corde primùm, deinde in cerebro aliisque partibus & per fibras vibrationem deferentes, & per vasa oscillationem propagantia, & per liquores fluxum majorem adeptos: inde pulsatio major in cerebro; major in nervis, major in locis ad quæ nervi desinunt, vibratio: major itaque undique in cerebrum, in cor repercutitur, major ubique liquoribus illiditur, major à liquoribus refunditur in solidas partes; eadem ratione multiplicantur, vigescunt motus, cogitationes: ideòque, nisi interveniat aliqua occasio perturbationem moderans, jam mens sui impotens evadat, jam cor nimiarum vibrationum impatiens rumpatur, jam vasa dehiscant, jam muscoli convellantur, viscera dissiliant, pulmones dissipentur, quæ reverâ funesta immoderatarum perturbationum eventa notantur. Adsit contra amor boni, quod assequi se non posse animus præjudicet: amor ille, ne tentamenta irrita molietur, iners; mens in illâ infelicitatis suæ cogitatione languidior, torpere, non modò nullos conatus meditari novos, sed protinus despondere; ergo imminutæ in corpore vibrationes; remitti illæ primùm in corde, deinde partes omnes paulatim in eandem lentitudinem trahi, liquores quasi stagnantiores, partes solidæ cessare paulatim; eaque cessatio major, nisi superveniat occasio perturbationem moderatura, eò forsan perveniat, ut machina omnis omni motu vitali destituatur. Hinc mechanicè intelligi potest, quàm sapienter præcipiant, qui jubent: Moderatis indulgeri sensationibus, ac nervos, aut ad nimias vibrationes adigant, aut nimis à vibrando remorentur: Consuli ægrorum imaginationi, ne læsa nervis allidat morbum ipsa suum: Vitari perturbationes nisi moderatissimas: Nimiam diuturnioremque mentis contentionem defugì, ne nimis eodem tenore tensos nervos reddat utilibus vibrationibus postea inhabiliores: Non raptim frangi, sed paulatim debilitari atque leniri incitatum perturbationem, aversâ cogitatione à re commovente animum, atque translatâ ad rem animo tranquillo accommodatam aut etiam irritatum sedaturam; ne si ab uno fine ad alterum rapidè transiliremus, motus contrarii fibras dissolverent, neque

cnim à lentissimâ ad celerrimam, neque à celerrimâ ad lentissimam vibrationem fit transitus sine periculosâ cordis, nervorum, medullæ, menyngum convulsione.

*Ergo perturbationes motum cordis sanguinisque aliæ augment,
aliæ minuunt.*

Proponebat Parisiis JOANNES MOULLIN, Ebroï-
censis, Baccalaureus Medicus, A. R. S. H. 1721.
à sextâ ad meridiem,